

Jesús - Zapotec, Rincón

DIDZA' DXI'A BUZÚAJĚ' MARCOS

1

Libán benĚ' Juan, bōnni' buquilĚ' bōnachi nisa

(Mt. 3:1-12; Lc. 3:1-9, 15-17; Jn.1 :19-28)

1 Caní gusí lo didza' dxi'a ca guca queĚ' Jesucristo, Zxí'inĚ' Dios.

2 Budxín lĚ' na' buzúajĚ' lu guichi Isafás, bōnni' bĚ'Ě' didza' uláz queĚ' Dios, le gunnĚ' Dios:

Buyútsōca', risōl-la'a bōnni' gubáz quia', inōruĚ' Lo'.

LĚ' upĚ'Ě' nōza ga tōdu'.

3 Yōn chi'Ě' tu bōnni' ulidzĚ' zidzaj lu lataj cá'asō, innĚ':

“Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tōdĚ'.”

4 Caní budxín, tu' ruquilĚ' Juan bōnachi nisa lu lataj cá'asō, en runĚ' libán para ila'dila bōnachi nisa, bōnni' na' bulu'bí'i lādxi'gaquiĚ' para uniti lahuĚ' Dios dul-la' nabága'gaquiĚ'. 5 Bila'rúaj bōnachi zían yúgu'tĚ' yōdzō luyú Judea, enca' yōdzō Jerusalén, en yōjáquiĚ' ga na' zoĚ' Juan, ate' Juan na' buquilĚ' légaquiĚ' nisa lu yegu Jordán, bōnni' na' gula'xóalĚpĚ' dul-la' nabága'gaquiĚ'.

6 NácuĚ' Juan lari' néquini lítsa'ba' bōa', en núguĚ'Ě' lĚ'Ě' tu guídi. RahuĚ'-ba' bōchi'zu, en re'jĚ' le zxixi que buzdo'. 7 RunĚ' Juan libán, rnnĚ':

—Si' zĚ'Ě' bōnni' tōdi na'a, náparĚ' yōl-la' unná bĚ' ca neda'. Biti' naca' neda' lesaca' yéchia', para ilecja' xiráchuĚ' nudĚ'Ě'. 8 Neda' ruquila' libí'ili' nisa, pero LĚ' gunĚ' le rulu'isō yōl-la' ridila nisa ni, uchíziĚ' libí'ili' Dios Bō' Lá'ayi.

RidilĚ' Jesús nisa

(Mt. 3:13-17; Lc. 3:21-22)

9 Tu dza ni' birúajĚ' Jesús yōdzō Nazaret luyú Galilea, ate' Juan na' buquilĚ' LĚ' nisa lu yegu Jordán. 10

Cate' burúajĚ' Jesús lu nisa, la' ná'asō bilé'enĚ' gualaj lúzxiba, en ruhuōtjĚ' Dios Bō' Lá'ayi, rulu'í cuinĚ' ca tuba' gu'dōdo', en bidisóalenĚ' LĚ'. 11 Biyōn chi'i nu ru'í didza' yehua' yubá, rnna:

—Li' nacu' Zxí'ina'. Nadxí'ida' Lí', en raza lādxa'a Lí'.

RĚ'Ěni tu' xihui' gun ga ibáguĚ'Ě' Jesús dul-la'

(Mt. 4:1-11; Lc. 4:1-13)

12 Ní'irō Dios Bō' Lá'ayi guchĚ'Ě' Jesús bayudxi lu lataj cá'asō. 13 GuzóĚ' Jesús lataj cá'asō na' idú choá' dza, ate' gú'uni Satanás tu' xihui' gun ga ibáguĚ'Ě' Jesús dul-la'. GuzóĚ' Jesús ga ni' ta'daba' bōa' guixi' dzō'ōba' gu'ado'. Yugu' gubáz lá'ayi queĚ' Dios gulácalenĚ' Jesús, en gula'gu'Ě' le gudahuĚ'.

Rusédinē' Jesús bönachi luyú Galilea

(Mt. 4:12-17; Lc. 4:14-15)

14 Gudödi gula'gu'ë Juan na' lidxi guié, sa'yéajē' Jesús luyú Galilea. Runē' libán ni' que didza' dxi'a ca rinná bē'ë Dios. 15 Caní rnnē':

—Chibidxín dza. Chizóa idinná bē'ë Dios. Buli'bí'i ládxi'li', en guli'tséajlē' didza' dxi'a ni.

Rulidzē' Jesús tapē' bönni' uzxön böla

(Mt. 4:18-22; Lc. 5:1-11)

16 Tsanni ni' ridē' Jesús ra' nísado' luyú Galilea, bilé'enē' Simón len Andrés, bönni' böchē'ë Simón na'. Nácagaquiē' uzxön böla, en ta'chiljē' yöxaj böla quégaquiē' lu nisa na'. 17 Jesús gudxē' légaquiē', rnnē':

—Guli'dutá' neda', ate' guna' ga ichē'ëli' bönachi quia' neda', gunli' ca runli' rizönlí'-ba' böla.

18 La' bulu'cá'angatē' yöxaj quégaquiē', en söjácalenē' Jesús.

19 Gudödē' Jesús ia'látí'do' ní'ilö, ate' bilé'enē' Jacobo, en Juan, yugu' zxf'inē' Zebedeo, nacu'ë lē'e bárcodo' quégaquiē', tu'únē' yöxaj böla quégaquiē'. 20 Jesús la' bulidztē' légaquiē', ate' bulu'cá'anē' xúzgaquiē' Zebedeo, dzáguiē' yugu' huen dxin queē' lē'e bárcodo' na', ate' söjácalenē' Jesús.

Tu bönni' yu'u lē' bö' xihui'

(Lc. 4:31-37)

21 Bila'dxinē' Jesús, en yugu' bönni' dá'gaquiē' Lē' lu yödzo Capernaum. Cate' ni' naca dza lá'ayi quégaquiē' bönni' judío, guyáziē' Jesús yu'u ga tu'dubē' bönni' judío, en tu'sedē' queē' Dios, ate' gusi lahuē' rusédinē' nupa nudúbigaca ni'. 22 Bulu'báninē' ca na' rusédinē' Jesús, tu' rusédinē' ca runē' tu bönni' dē lu nē'ë, en calēga ca tunē' bönni' yudo' usēdi. 23 Zóatē' ca' tu bönni' yu'u lē' bö' xihui' lu yu'u ga na' tu'dubē' tu'sedē' queē' Dios, ate' gurōdxi'ë bönni' na', rnnē':

24 —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbē'a Li', nacu' Bönni' Lá'ayi queē' Dios.

25 Jesús buzenē' le bach, rnnē':

—Busayaj ru'u, en burúaj lu bönni' ni.

26 Ní'irö bö' xihui' na' buxízida' bönni' na' yu'u lē', ate' gurōdxi'a zidzaj, en la' burúajtē. 27 Bulu'báninē' yúgu'tē bönni' nacu'ë ni', ate' gula'nabi luzē'egaquiē', ta'nnē':

—¿Bizxi caz lē ni? ¿Naru' nácatsö xibá cubi? ¡Len yöl-la' unná bē' rinná bé'enē' yugu' bö' xihui', ate' tun ca rnnē'!

28 La' guzētē didza' que yöl-la' huáca queē' Jesús, ate' bila'yöni bönachi idútē luyú Galilea na'.

Ruúnē' Jesús xiná'anu nigula queē' Pedro

(Mt. 8:14-15; Lc. 4:38-39)

29 Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. 30 Ní' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. 31 Ní'irö gubígui'ë Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

32 Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. 33 Yúgu'të bönachi lu yödzö bila'guíró ga nu riyaza yu'u ga na' zoë' Jesús. 34 Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

35 Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. 36 Simón, en nupa nacué'len lë' söjdíljagaquië' Jesús. 37 Cate' yöjxáca'gaquië' Lë', té' Lë': —Yúgu'të bönachi tu'guílaj Li'.

38 Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

39 Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

40 Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxi'bë', en gúta'yue' lahuë', rnnë': —Channö rë'ënu', huáca unu' neda'.

41 Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóacu'.

42 Ca gunnë' ca', la' bunítitë huë' ré'enë', en böáquië' dxí'ado'. 43 Ní'irö Jesús buzenë' bach bönni' na', en la' busól-la'të' lë'. 44 Caní gudxë' lë':

—Cuntu nu guío' ca bena' quiu', pero guyéaj, yöjlu'í' cuinu' lahuë' bixúz, en yöjndzaj para le böácanu' lí' que yudo' ca na' gunná bë'ë Moisés, lë na' uluf'í bönachi chinuhuóacu'.

45 Burúajë' bönni' ni, en gusí lahuë' rigúxjöi'inë' bönachi zían ca guca queë'. Tu' buzë' didza' ni, bíti'rö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të

yödzö bila'dxín ga na' zoë' Jesús.

2

Bönni' ré'enë' huë' nacú'unië' bin

(Mt. 9:1-8; Lc. 5:17-26)

1 Cate' chigudödi chopa tsonna dza, buázië' Jesús yödzö Capernaum, ate' guzë didza' zoë' yu'u. 2 La' bulu'dúbitë bönachi zían ga na' zoë' Jesús, ga bidxintë bíti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. 3 Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. 4 Biti' guca ila'dxinë' lahuë' Jesús tu' nacué' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxíë' yeru na', ni' bulu'zötjë' le denë' bönni' huë' na'. 5 Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':
—Zxi'ina', chibunít lahua' li' ca naca dul-la' nabágu'u.

6 Rõ'ögaquië' bal-lë' bönni' yudo' usedi ni'. Ta'zá' ládxi'gaquië', ta'nnë': 7 ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. 8 La' gúquibe'etenë' Jesús le ta'zá' ládxi'gaquië', ate' gudxë' légaquië':
—¿Bizx que rizá' ládxi'li' caní? 9 Biti' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ni'ë. 10 Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi. Ní'irö Jesús gudxë' bönni' huë' na':

11 —Li' rea': Guyasa. Buá' le denu', en böaj lidxu'.

12 La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacué' ni'. Bulu'bánninë' yúgu'të', en gula'gu'ë Dios yöl-la' ba, ta'nnë':
—Catu caz rilé'etu' le caní.

Jesús rulidzë' Leví

(Mt. 9:9-13; Lc. 5:27-32)

13 Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. 14 Cate' ridödë' Jesús ni', bilé'enë' Leví, zxi'inë' Alfeo, rë'ë ga ruquíxjë' uláz que yödzö zi'tu'. Jesús gudxë' lë':
—Gudá' neda'.
La' guyásatë' Leví na', sa'yéajlenë' Jesús.

15 Gudödi guca lë ni, rë'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rë'ölengaquië' tsözxön Jesús, en yugu' bönni' usëda queë'. Caní guca, tu' rójaca bönachi zían len Jesús. 16 Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rë'ë rágulenë' tsözxön yugu' bönni' uquíxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':
—¿Bizxi caz runtsë'? iRë'aj rágulentse' yugu' bönni' uquíxaj, en ia'bal-lë' bönni' dul-la'!

17 Biyönnë' Jesús didza' ni tu'ë, en gudxë' légaquië':

—Nupa nacuá' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i ládxi'gaca.

Ru'ë Jesús didza' que yöl-la' run gubasa

(Mt. 9:14-17; Lc. 5:33-39)

18 Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

19 Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa. 20 Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

21 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachöza' lari' tëbi na', ate' huaröza'rö lari' tëbi na'. 22 Lësca' caní cuntu nu bönni' queë' xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië' Jesús ta'lecjë' do dza lá'ayi

(Mt. 12:1-8; Lc. 6:1-5)

23 Tu dza lá'ayi quegaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí lógaquië' ta'lecjë' do ga dxía xzoa' xtila. 24 Ní'irö bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

25 Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' 26 ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' biti' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacuá'lenë' lë'.

27 Ní'irö Jesús gudxë' légaquië':

—Dios benë' dza lá'ayi le ulu'zí' xibé bönachi, calëga benë' bönachi para ilún chí'i dza lá'ayi. 28 Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

1 Leyúbölö guyu'ë Jesús tu lu yu'u ga tu'dubë' tu'sédë' bönni' judío queë' Dios, ate' zoë' ca' ni' tu bönni'

narequi' në'ë. 2 Bönni' yudo' nacu'ë ni' tu'yúé' Jesús channö ünë' bönni' na' dza lá'ayi, tu' tē'ënnë' ulu'zégui'ë Lë' didza'. 3 Ní'irö Jesús gudxë' bönni' na' narequi' në'ë, rnnë':
—Guyasa, en guzuf' lógaca bönachi ni.

4 Jesús gunábinë' bönachi ni', rnnë':

—¿Naru' dë lataj gunru' le naca dxí'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. 5 Ní'irö len yöl-la' rilé queë', buyúé' Jesús bönachi na' nacuá' gásibi'ilë'.

Ruhuf'innë' tu' nácaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácate' dxí'ado' në'ë. 6 Ní'irö bulu'rúajë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zían ra' nísado'

7 Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sójácalen Lë' bönachi zían narúajgaca luyú Galilea, en luyú Judea. 8 Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacuá' idú gásibi'ilö ga nacuá' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca náca'gaca yugu' le zxön runë' Jesús. 9 Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zían na' Lë'. 10 Caní guca tu' chibunë' zían nupa te'e, ate' bila'guíró bönachi zían na' ga zoë' para ila'gán Lë'. 11 Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

12 Jesús buzenë' le bach bö' xihui' na', cabí ila'guixjö' nu náquië' Lë'.

Riböë' Jesús chinnu bönni' ilácaquië' gubáz queë'

(Mt. 10:1-4; Lc. 6:12-16)

13 Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'. 14 Jesús bucu'ë chinnuë' bönni' ni, para ila'cuá'lenë' Lë', en para isöl-lë'ë légaquië' tsójéngaquië' libán. 15 Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi. 16 Caní náca'gaca lágaquië':

Simón, (buzóë' Jesús ia'tú lë', Pedro),

17 Jacobo,

Juan, (bönni' böché'ë Jacobo, ate' náca'gaquië' zxf'inë' Zebedeo. Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sínia' ca guziú'),

18 Andrés, Felipe, Bartolomé, Mateo, Tomás,

Jacobo, (zxf'inë' Alfeo),

Tadeo,

Simón, (bönni' ruf'i lácxë'ë yödzö queë'),

19 Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. 20 Leyúbölö bila'guirö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. 21 Cate' dí'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

22 Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

23 Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? 24 Channö ila'rúaj choplö bönachi tu yödzö, en ila'díl-lalen luzë'eguequi, biti' gaca idía' yödzö na'. 25 Lësca' caní channö ila'rúaj choplö bönachi nacua' tu yu'u, en ila'díl-lalen luzë'eguequi, biti' gaca ila'día' bönachi nacua' yu'u na'. 26 Que lë ni na', channö Satanás tu' xihui' tá'baga' luzë'e, narúajgaca choplö bö' xihui'. Biti' gaca idía' yöl-la' unná bë' que, pero chizóa údxi que.

27 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

28 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná, 29 pero nútí'tës nu innë schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

30 Caní gunnë' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

31 Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús. 32 Bönachi zían na' rö'gaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

33 Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

34 Ní'irö buyúë' nupa na' rö'gaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' böcha'a. 35 Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

Rucúdzu'ë didza' Jesús ca naca queë' bönni' guz

(Mt. 13:1-9; Lc. 8:4-8)

1 Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zián ga zoë', ate' gurenë' Jesús tu lë'e bárcodo' zxa lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. 2 Zián le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

3 —Gulizë nágalí didza' ni. Birúajë' tu bönni' guz, søjësië' xisedo'. 4 Tsanni ni' rúsië', gulasi bal-la xisedo' na' ra' nöza, ate' bila'dxinba' biguúnnido', gulë'ajba' le. 5 Gulasi ia'bal-la xisedo' na' ga rö'ö guiöj ga bití rö'ö yenni' yu. Bayón gula'lén xisedo' na' tu' cabí rö'ö yenni' yu. 6 Ní'irö cate' gulén gubidza, buquexu' le, ate' gubidxi, tu' cabí nun luí ga rë'. 7 Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití bi bunödzej. 8 Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

9 Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

Riguíxjö'ë Jesús bizx que rucúdzu'ë didza'

(Mt. 13:10-17; Lc. 8:9-10)

10 Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxön idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'. 11 Jesús gudxë' légaquië', rnnë': —Libí'ili' nadéli'li' tséajni'ili' le nagachi' ca rinná bë'ë Dios, pero nupa na' bití nácagaca tuz len rë'u, ru'filena' légaquië' didza' yugu' le rucúdzu'a didza'. 12 Caní runa' para gaca lë na' nazúaj lu guichi lá'ayi, rna:

Ulu'yúë', en bití ila'lé'enë'.

Ulu'zë nágagaquië', en bití ila'yéajni'inë'.

Bití ulu'bfi' ladxí'gaquië' para gaca uniti lahua' légaquië' ca naca dul-la' nabága'gaquië'.

Riguíxjö'ë' Jesús le bucúdzu'ë didza'

(Mt. 13:18-23; Lc. 8:11-15)

13 Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zica'rö le ucúdzu'a didza'? 14 Bönni' guz na' náquië' nu ruzë xtídzë'ë Dios.

15 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yönnisënë' ca', la' za'të Satanás tu' xihui', en rigúa didza' na' bidxín lu icja ladxí'do'gaquië'.

16 'Nácagaca ia'bal-la bönachi ca xisedo' na' gulasi ga rö'ö guiöj. Ta'yönnë' didza' na', ate' len yöl-la' rudzeja quégaquië' ta'zi'ë le. 17 Bití riyaza icja ladxí'do'gaquië', ate' tu ch'isö ta'dë'ë le. Cate' bi raca quégaquië', o zoa nu ribía ladxí' légaquië' tu' ta'dë'ë didza' na', la' tu'huöatë ladxí'gaquië'.

18 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', 19 pero tu'f'i ládxi'gaquië' le nácagaca que yödžölió ni. Nazí' yé'eguequinë' tu' nadxf'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

20 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'z'f' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödžaj ia'chí uruá' huéaj. Nácagaca ia'bal-lë' ca xisedo' na' bulu'nödžaj ia'tsónnalalaj ca', ate' nácagaca ia'bal-la bönachi ca xisedo' na' bulu'nödžaj ia'tú gayuá' ca'.

Rucúdzu'ë didza' Jesús que tu le rigú'u bení'

(Lc. 8:16-18)

21 Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. 22 Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. 23 Nu zoa nagui, en riyöni ral-la' uzë nagui.

24 Gudxë' ca' légaquië':

—Guli'güí' ládxi'li' le riyönilí'. Ca naca le ruríxili', la' leze urixë' Dios queëli', ate' gunnë' queëli' ia'lati'. 25 Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

Rucúdzu'ë didza' Jesús ca rizxön zxoá' xtila

26 Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxoá' xtila lu yu. 27 Chi'i dzö'ölö rásië', en riyasë' cate' za' rení'. Ta'lén zxoá' xtila na', en ta'zxön, pero bití' nöžinë' lë' nacxi raca ta'zxön. 28 La' cuínsi luyú na' ruxön le nadúzgaca luyú na', z'f'alö xiyazi, ní'irö za' do que, en tödi na' cuía xui'i nál-la lu do que. 29 Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

30 Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? 31 Raca ca raca que tu xisedo' mostaza. Cate' riyaza luyú naca tu xisedo' nácatërö cuidi' ca yúgu'të xisedo' dzö'ö luyú, 32 pero cate' chinadúz, rilén, en rizxöntërö ca yúgu'të guixi' cuan rö'gaca luyú. Tsca run yana' ní'a në'e, gaca ila'dxinba' biguínido', en ulu'dxíaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'

(Mt. 13:34-35)

33 Caní guca, busédinë Jesús légaquië', en zíanrö ca' le bucúdzu'ë didza' tsca guca ila'yéajni'inë'. 34 Yúgu'të didza' bë'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

35 La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsölá'a nísado' ni.

36 Ní'irö bulu'lá'alenë' bönachi zían nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sójácalen légaquië'. 37 Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. 38 Dë' rásië' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—iBönni' Usedi! ¿Naru' cabí ru'í ládxi'tso' netu'? iHuáti caztu' lu nisa ni!

39 Ní'irö guyasë' Jesús, en gunná bé'enë' bö' na' recja, gunnë':

—Gurö'ö dxi.

Gudxë' ca' nisa na', gunnë':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'. 40 Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

41 Ni' tádxinë' gulë luzë'ë tuë' ia'túë':

—¿Nuzxi caz bönni' ni? iTun bö' recja, en nísado' ca rnna xtídzë'ë!

5

Bönni' Gadara yu'u bö' xihui' lë'

(Mt. 8:28-34; Lc. 8:26-39)

1 Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. 2 Cate' burúajë' Jesús lë'e bárcodo' na', tu bönni' rirúajë' zcan bulóaj ga nacuá' yeru ba la' dutságatë' Lë'. Bönni' ni yu'u bö' xihui' lë', 3 ate' nun xilatjë' ga na' nacuá' yeru ba. Cuntu nu guca guga' bönni' na', calëga len du guíë. 4 Zían luzuí bulu'zöë' bregui' guíë yen në'ë, en ni'ë, en gulúgui'ë lë' du guíë. Yugu' du guíë na' bulë'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. 5 Ridática'së' ribödxí'ë rëla, en të dza ga na' nacuá' yeru ba, en gapa naca lu guí'ado', run huë' cuinë' yugu' lu guíöj dzö'ö ni'. 6 Cate' bilé'enë' zë'ë zi'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. 7 Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayëpisëtë'rë'? Ni'a queë' Xanru' Dios ráta'yua' lo', biti' usaca' zi'u neda'.

8 Caní gunnë' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

9 Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rō'ō ziantu'.

10 Gula'nabi yechi' yugu' bö' xihui' na' Jesús para cabí isōl-lë'ë léguequi zi'tu' luyú ni'. 11 Nacuá'aba' cuchi zián lu guí'ado' ní'isō, ta'daba' táguba' ni'. 12 Gula'nabi yechi' bö' xihui' na' Jesús, ta'nná:
—Gusōl-la' netu' ga ni' dzō'ōba' cuchi zián. Bë' netu' lataj tsōjtsú'ugacatu'-ba'.

13 La' bë'të' Jesús léguequi lataj, ate' bila'rúaj bö' xihui' na', en yōjtsú'ugaca cuchi zián na', ate' gula'xítiba' cuchi zián na', yōjbíxigacaba' ga naca ra' guí'a, yōjcházagacaba' nísado'. Lu nísado' na' gula'yëpiba' nisa, gulátiba', en nácagacaba' ca galaj gayuá'aba'.

14 Ní'irō bulu'zxunnaj nupa ni' gulún chi'i cuchi zián na'. Yōjtíxjōi'iguequinë' bönachi lu yōdzō ni', enca' bönachi nacuá' la' guixi' ni'. Bila'rúaj bönachi lu yōdzō, sōjyúgaquië' bizxi na' guca ni'. 15 Cate' bila'dxinë' ga ni' zoë' Jesús, bila'lé'enë' bönni' na' zí'alō yú'ugaca bö' xihui' lë'. Bönni' ni rō'ë ni', nácuë' lari', en zoë' dxí'ado', ate' guladxi bönachi na'. 16 Nupa na' bila'lé'e le benë' Jesús gula'guíxjōi' bönachi na' bila'rúaj lu yōdzō ca na' guca queë' bönni' na' zí'alō yú'ugaca bö' xihui' lë', enca' ca guca quégacaba' cuchi na'. 17 Ní'irō gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zí'alō yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. 19 Jesús biti' bë'ë lë' lataj, pero gudxë' lë':

—Bōaj lidxu'. Yōjtíxjōi' dī'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

20 Sōhuōjë' bönni' na', en ruzë' didza' yugu' yōdzō Decápolis ca nácagaca le zxön benë' Jesús queë', ate' bulu'bani yúgu'të bönachi nacuá' yugu' yōdzō ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

21 Cate' budxinë' Jesús ia'tsōlá'a nísado' na', ní'irō bulu'dubi bönachi zián ga na' zoë' ra' nísado'. 22 Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxbë' lahuë', 23 en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

24 Sa'yéajlenë' Jesús lë', ate' bönachi zián sōjácálen Jesús, tu'quirō Lë'. 25 Tu nigula, chinaca chinnu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula. 26 Yenni' chigudí'i guzácá'nu lu ná'agaquië' zián bönni' tu'únë' bönachi. Nítisō chibutōnu dëra le dë queënu, tu' cabí bi gúcalen lënu, pero riyali' queënu. 27 Cate' biyōninu tuí'i didza' bönachi ca naca queë' Jesús, gudōdinu ládjalō bönachi zián na', en bidxinu zaca' cúdzu'lë' Jesús, en gudannu lari' nácuë'. 28 Caní bennu tu' rnnanu: "Channō cansa' le nácuë', huóaca'." 29 La' buí'të rön queënu, ate' réquibe'enu chibóacanu que le guca queënu.

30 La' gúquibe'etenë' Jesús ben dxin yōl-la' huáca queë', ate' buécjë', ruyúë' bönachi zián na'. Rnnë':

—¿Nuzxi na' gudán neda'?

31 Ní'irö bönni dá'gaquië' Lë' të' Lë', ta'nnë':

—Rilé'e queézinu' bönachi zían ni tu'quirö Li', en rnatso': "¿Nuzxi na' gudán neda'?"

32 Ruyúé' Jesús gásibi'ilë' para il'éenë' nuzxi na' gudán Lë'. 33 Ní'irö nigula na' gubíga'nu lahuë'.

Rádxinu, en rizízinu tu' chinózinu bi na' guca queënu, ate' buzóa zxfbinu lahuë' Jesús, en gúdxinu Lë' idútë le nácatë. 34 Jesús rë'ë-nu:

—Nigúlado'. Chibóácu' tu' réajlë'u neda'. Böaj lidxu' idú ládxu'u. Tsaz nuhuóácu' que le guca quiu'.

35 Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

36 Biti' bë' ládxë'ë Jesús lë na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

37 Biti' bë'ë lataj Jesús tsójácalen Lë' ia'zica'rö bönachi, pero légacasë' Pedro, en Jacobo, en Juan, böchë'ë Jacobo na'. 38 Cate' bidxinë' lidxë' bönni' na' rinná bë'ë ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'. 39 Guyázië' Jesús, en gudxë' légaquië':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

40 Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacua'len Lë', ate' guyázië' ga na' dëbi'. 41 Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rna lu didza' xidza': Bi'i nigúlado', guyasa. 42 La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacua' ni'. 43 Ní'irö Jesús gunná bë'enë' légaquië' cuntu nu ulu'siyönnë' lë na' guca. Gudxë' légaquië':

—Guli'güf' le gágubi' bi'i nigúlado' ni.

6

Rídxinë' Jesús Nazaret, le naca ladzë'

(Mt. 13:53-58; Lc. 4:16-30)

1 Buzë'ë Jesús ni', budxinë' ladzë', ate' yugu' bönni' dá'gaquië' Lë' sójácalenë' Lë'. 2 Cate' bidxín dza lá'ayi quegaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizëdë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácacaca bë' na' zá'gaca yehua' yubá? 3 Náquië' bönni' ni gubëdxi yaga na', en zxfíninu María. Náquië' böchi'gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö. 4 Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacua' lidxë' bití' tun lë' bal.

5 Que lë ni na' bití' guca gunë' Jesús nitú yöl-la' huáca zxon ni'. Bunsë' nabábasö bönachi te'e cate' guxóa në'ë léguequi. 6 Bubáninë' Jesús tu' cabí ta'yéajlë' Lë'. Gudödi na' gudödë' yugu' yödödö' nacua'

gásibi'ilö, rusēdinē' bönachi ni'.

Risöl-lē'ē Jesús bönni' dá'gaquiē' Lē' tsójéngaquiē' libán

(Mt. 10:5-15; Lc. 9:1-6)

7 Ní'irö bulidzē' Jesús idxínnutē' bönni' dá'gaquiē' Lē', en gusí lahuē' risöl-lē'ē légaquiē' chopa huéajgaquiē'. Budödē' lu ná'agaquiē' yöl-la' unná bē' ulu'béajē' yugu' bö' xihui' yú'ugaca bönachi. 8 Gunná bé'enē' légaquiē' biti' bi ilu'ē la' nöza, calēga yöxaj, calēga yöta, en calēga dumí biti' ila'gu'ē lu buzudi quégaquiē', pero iluá'asē' xiyágado'. 9 Ral-la' ulu'dē'ē xiráchugaquiē', pero calēga chopa lari' ulu'xóa yéngaquiē'. 10 Gudxē' ca' légaquiē':

—Gátitēs ga tsú'uli' tu yu'u, guli'sóa yu'u na' cate' uzá'aröli' yödzö na'. 11 Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zē' nágagaquiē' xtídza'li', buli'rúaj ni', en buli'quinnaj bëchtö da' lē'e lálali'. Lē ni gaca bē' nabága'gaquiē' xíguia'. Le nácatē' rea' libí'ili', cate' idxín dza ichúguie' Dios quégaca bönachi, ila'gu'í ila'záca'rö bönachi lu yödzö na' ca ila'gu'í ila'záca' bönachi Sodoma, en Gomorra, yugu' yödzö na' busunítiē' Dios.

12 Ní'irö bila'rúajē' bönni' dá'gaquiē' Lē', yöjéngaquiē' libán ca ral-la' ulu'bí'i ládxi'gaca bönachi. 13 Bulu'béajē' zían bö' xihui' yú'ugaca bönachi. Gula'gu'ē le za zían nupa te'e, ate' bulu'huóáquiē'.

Ca bētigaquiē' Juan, bönni' buquilē' bönachi nisa

(Mt. 14:1-12; Lc. 9:7-9)

14 Biyönnē' Herodes, bönni' unná bē', ca naca le runē' Jesús, tu' rizē didza' gátitēs que yöl-la' huáca queē'. Bal-la bönachi ta'nná:

—Chibubanē' Juan, bönni' ni' buquilē' bönachi nisa, lu yöl-la' guti. Que lē ni na' napē' yöl-la' huáca runē' yugu' lē ni.

15 Ia'bal-la bönachi ta'nná:

—Naquiē' Elías, bönni' bē'ē didza' uláz queē' Dios dza ni'te.

Ia'bal-la bönachi ta'nná:

—Naquiē' bönni' ru'ē didza' uláz queē' Dios ca guláquiē' bönni' gulu'ē didza' uláz queē' dza ni'te.

16 Cate' biyönnē' Herodes yugu' lē ni, gunnē':

—Naquiē' Juan, bönni' na' burixa' yenē'. Chibubanē' lu yöl-la' guti.

17 Caní gunnē' Herodes tu' gusöl-lē'ē lē cazē' bönni' yöjxōngaquiē' Juan na', ate' gulúgui'ē lē' du gufé lu yu'u lidxi gufé. Caní benē' Herodes tu' rilenu Herodías Juan na'. Nácanu nigula na' gúcanu nigula queē' Felipe, böchē'ē Herodes na'. Herodes gudúē'-nu Herodías na', en butsağa ná'alēnē'-nu. 18 Juan na' gudxē' Herodes:

—Biti' ral-la' sóalenu'-nu nigula queē' böchu'u.

19 Que lē ni na' gusí gurō'önu Herodías. Gú'uninu bi gunnu queē' Juan, tu' gú'uninu gútinu lē', pero biti' bi guxzéqui'nu 20 tu' rádxinē' Herodes Juan. Nözinē' náquiē' Juan na' tsahui', en lá'ayi. Que lē ni na' gudapa chi'ē lē', en buzē' náguiē' lē' idú ládxi'ē sal-la' lē na' rnnē' Juan ben ga gurō'ē böniga Herodes na'. 21 Ní'irö bidxín tu dza guxzéqui'nu Herodías na', le naca dza runē' Herodes laní que dza

guyé'enë' iz. Bupê'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' rójáquië' gudil-la, enca' bönni' ná'cagaquië' lo luyú Galilea. 22 Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza lédxë'ë Herodes ca runbi', en gula'yaza lédxi'gaca ca' nupa tē'aj tágulen lē'. Ní'irō Herodes gudxë'-bi' bi'i nigula na', gunnē':
—Gunaba bi rē'ënu' gunna' quiu', ate' guna' ca'.

23 Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bē'a.

24 Burúajbi' lēbi', ate' gunábabi' xiná'abi':

—¿Bizxi inábatsa'?

Lēnu gúdxinu-bi':

—Icjë' Juan, bönni' buquilë' bönachi nisa, inabu'.

25 La' buázatēbi' ga na' zoë' Herodes, en rēbi'-nē':

—Rē'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

26 Ní'irō bu'innë' Herodes, pero tu' buzötjë' Dios, en tu' bila'yöni ca' nupa tágulen lē', biti' gú'unnë' initi xtídzë'ë na' guzxi' lu nē'ë queëbi'. 27 Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lē' tsójxi'ë icjë' Juan. 28 Bönni' na' rejë' gudil-la guyijë' lidxi gufë, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lēbi' bunödzejabi' le queënu xiná'abi'.

29 Cate' bönni' dá'gaquië' Juan na' bila'yönnë' didza' chiguca lē na', bila'dxinë' ni', en bulu'ú'ë lē', ate' yöjčáchi'gaquië' lē' yeru ba.

Rugahuë' Jesús zianró ca chi-un gayuá' bönachi

(Mt. 14:13-21; Lc. 9:10-17; Jn.6 :1-14)

30 Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lē' yúgu'të le gulunë', en yugu' le bulu'sēdinë' bönachi. 31 Nacuá' bönachi zían ni', nupa zá'gaca, en nupa sōjaca, ga bidxintë bíti'rō dë lataj ilahuë' Jesús, en yugu' bönni' dá'gaquië' Lē'. Que lē ni na' Jesús gudxë' légaquië', rnnë':
—Guli'dá. Uyéaj cázaru' ga naca lataj cá'asö, en uzí lédxi'ru' tu chí'i.

32 La' légacasë' yöjáquië' tu lē'e bárcodo', ate' bila'dxinë' tu lataj cá'asö. 33 Bila'lé'e bönachi zían légaquië' sōjáquië' ni', en núnbë'gaca Jesús. Que lē ni na' bönni' yúgu'të yödzö ni' carelō yöjáquië' ni'. Gula'zë'e ní'agaquië', ate' bila'dxinë' ni' zí'atēlō ca Jesús, en yugu' bönni' dá'gaquië' Lē'. 34 Cate' burúajë' Jesús lē'e bárcodo' na', bilé'enë' bönachi zían na', ate' buéchi' lédxë'ë légaquië' tu ná'cagaquië' ca bö'cu' zxíla'do' biti' zoa nu gapa chí'i légacaba'. Gusí lahuë' rusēdinë' légaquië' le zían. 35 Cate' chiridzō' dza na', yugu' bönni' dá'gaquië' Jesús bila'dxinë' ga zoë', en tē' Lē':
—Chiridzō', ate' lataj cá'asö naca ni. 36 Busöl-la' bönachi zían ni para tsōjaca yugu' yú'udo', en yugu' yödzödo' nacua' gásibi'ilō, tsōjō'ugaca yōta, tu' cabí bi dë ni le ilagu.

37 Bubi'ë didza' Jesús, gudxë' légaquië':

—Guli'gúf' libí'i cázali' le ilahuë'.

Gulë' Lē':

—¿Naru' tsjö'utsatu' yöta xtila len lázxtatu' que idú xunu' beo', ate' güf'itu' le ilahué'?

38 Jesús gudxé' légaquié':

—¿Bal-laxi yöta xtila dë queéli'? Gul'itsöjyútsöca'.

Cate' chinöziguequiné', tē' Lē':

—Gáyu'sö yöta xtila dë, en chópasöba' böla dëba'.

39 Ní'irö gunná bē'ē Jesús iluné' ga ila'bō' bönachi zían na', ila'cuá' tu cō' huéajguequi ga naca lachi' lu daca'. 40 Gula'cu'ē tu cō' huéajgaquié', tu gayuá' huéajgaquié', en chi-un huéajgaquié'. 41 Ní'irö gudélē'ē Jesús igáyu'tē yöta xtila na', en irópaba' böla na'. Buyúē' zaca' lúzxiba, en gudxé' Dios: "Xclenu'." Ní'irö buzuxzjé' yöta xtila na', en bē'ē quégaquié' bönni' usēda queé' para ila'guísié' quégaca bönachi zían na'. Gudísié' ca' irópatēba' böla na' quégaca yúgu'tē bönachi na'. 42 Gulahué' yúgu'tē, en bulu'huöljané'. 43 Ní'irö bulu'tubé' le bizxaj que yöta xtila na', en quégacaba' böla, ate' chinnu ga'böra bulu'líé'. 44 Guláquié' ca chi-un gáyu'ē bönni' na' gulahué'.

Rizé'e ni'ē Jesús lu nísado'

(Mt. 14:22-27; Jn.6 :16-21)

45 La' benté' Jesús ga gula'bené' yugu' bönni' dá'gaquié' Lē' lē'e bárcodo', para ila'nörué' lahué', ila'dödé' lu nísado' na', para ila'dxiné' lu yödzö Betsaida, tsanni ni' Lē' rusöl-lē' bönachi zían na' lídxiguequi. 46 Cate' chibudxi busöl-lē' légaquié', guyijé' tu lu guf'ado', ate' ni' ru'ílené' Dios didza'. 47 Cate' chizá' ral-la, zeaj bárcodo' na' gatsaj láhui'lö nísado', ate' zoé' Jesús tuzé' luyú bidxi na'. 48 Bilé'ené' Jesús légaquié', böniga tu'sē'ē bárcodo' na' tu' recja bö' za' ga na' ta'dödé'. Gudödi guluhuēla bidxiné' Jesús ga na' nacu'ē, rizé'e ni'ē lu nísado' na', ate' gú'unné' tōdisé' ga na' nacu'ē. 49 Cate' bila'lé'ené' Lē' rizé'e ni'ē lu nísado', guléquiné' bixín na', ate' gula'bōdxi'ē 50 tu' bila'lé'ené' yúgu'tē' Lē', en guladxi gula'dzöbiné'. Ní'irö la' bulidzté' Jesús légaquié', rnné':

—Bul'ítipa ládxi'li'. Neda' caz. Biti' gádxili'.

51 Gurené' Jesús lē'e bárcodo' ga na' nacu'ē, ate' gurö'ö dxi bö' na' recja, ate' légaquié' gula'niti gula'tíqui'siné' bulu'bánniné'. 52 Biti' ta'yéajni'ininé' le rulu'í lē na' bené' Jesús que yöta xtila na'. Ní' naca zidi icja ládxi'do'gaquié'.

Ruúné' Jesús nupa te'e lu yödzö Genesaret

(Mt. 14:34-36)

53 Gula'dödé' Jesús, en yugu' bönni' dá'gaquié' Lē' ia'tsölá'a nísado', ate' bila'dxiné' ga naca lu xiyúgaca bönachi Genesaret. Bulu'dxígué'ē bárcodo' luyú bidxi ni'. 54 Cate' bulu'rúajé' lē'e bárcodo' na', la' bulu'únbé'tē bönachi ni' Jesús. 55 Gula'xiti' bönachi na', yöjaca yúgu'tē yödzödo' idú gásibi'ilö, en gula'sí lógaquié' dujuá'agaquié' yúgu'tē nupa te'e ga zoé' Jesús, zxóagaca yugu' le déguequini, ate' bila'dxiné' gáti'tēs ta'yönné' zoé' Jesús. 56 Gáti'tēs ga ridödé' Jesús, yugu' lu yödzödo', en yugu' yödzö zxön, en yugu' yú'udo', tu'cu'ē nupa te'e quégaquié' gapa naca la' nöza, en gapa naca lu yē'ēyi, en ta'tá'yue' lahué' Jesús gu'ē légaquié' lataj ila'gansé' luzxi lari' nácué'. Yúgu'tē nupa na' bila'gán lari' nácué' bulu'huóacaté dxí'ado'.

Le tun ga biti' nácagaca bönachi tsahui' lahuë' Dios

(Mt. 15:1-20)

1 Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. 2 Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'. 3 Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', biti' ca' tahuë'. 4 Cate' tu'dxinë' röjõ'ugaquië' lu yë'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yõ'õna, en yugu' zxiga' guíë, en yugu' le tátu'në'. 5 Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':
—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta biti' nuchí'agaquië' ná'agaquië'?

6 Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunnë':

Yugu' bönni' ni, len rú'agacasë' tunë' neda' bal,
calëga idú ládxi'gaquië'.

7 Níti'sö naca yöl-la' ba ta'gu'ë neda'
tu' tu'sëdinë' le ta'nná bë' bönachi,
calëga xibá quia'.

8 Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönachi.

9 Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. 10 Moisés gunnë' caní: "Ben bal xuz xinó'o." Gunnë' ca: "Nu ulidza zi' xuzi o xinë'e, guli'gútité nu na'." 11 Mark.7.12 Lib'ili' rnnali' caní: "Channö nu bönni' guíë' xuzë' o xinë'ë: Biti' gaca bi gunna' queëli', tu' naca Corbán." (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': "Biti' run bayudxi bi gunë' bönni' na' quégaquië' xuz xinë'ë." 13 Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudödili' lu ná'agaca zxi'ini xi'sóali'. Zíanrö ca' le caní runli'.

14 Ní'irö Jesús bulidzë' bönni' zían na' nacu'ë ni', en rë' légaquië':

—Guli'zë nágali' didza' gu'a, yúgu'tëli', en guli'tséajni'i. 15 Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë, lë ni gaca gun ga biti' náquië' tsahui' lahuë' Dios. 16 Channö zoa nágali', en riyónili', buli'zë nágali'.

17 Cate' Jesús bulá'alënë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'. 18 Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', biti' gaca gun ga biti' náquië' tsahui' lahuë' Dios? 19 Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunnë' caní Jesús, buluf'inë' rë'u naca dxi'a yúgu'të le rë'aj ráguru'. 20 Gunnë' ca' Jesús: —Le rirúaj lu bönni' run ga biti' náquië' tsahui' lahuë' Dios. 21 Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, 22 en ta'banë', en ta'zë ládxi'gaquië' le dë que luzá'agaquië', en tu'ë dö', en ta'z'f' yë'ë, en tu'zxë'ë, en ta'nná' z'ë que luzá'agaquië', en tun ba zxön cuíngaquië', en tunë' le canöz. 23 Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

24 Buzë'ë Jesús ni', ate' bidxinë' gala' ga nacua' yödzö Tiro, en yödzö Sidón. Guyázië' tu yu'u ni', en gú'unnë' cunttu nu inözi, pero biti' ca' guca ucachi' cuinë'. 25 Tu nigula zóabi' bi'i nigúlado' queënu, yu'u bö' xihui' lëbi', biyönninu didza' rizë ca naca queë' Jesús, ate' la' bídatënu ga zoë' Jesús, en buzóa zxíbinu xini'ë. 26 Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. 27 Ní'irö Jesús gudxë'-nu, rnnë': —Bë' lataj ulu'huöläj z'f'alö nupa nácagaca ca zxf'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bö'cu'do'.

28 Bubf'inu didza' nigula na', gúdxinu Jesús:

—Ön, Xan, pero yugu' bö'cu'do' nacua'aba' zxani ga tágubi', táguba' le bizxaj tu'huöxaj ga na' tágubi'.

29 Ní'irö Jesús gudxë'-nu, rnnë':

—Tu' gunnó' caní, huáca huöaju'. Chiburúaj bö' xihui' na' guyú'u-bi' bi'i nigúlado' quiu'.

30 Cate' budxinnu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruúnë' tu bönni' nacödzüë', en biti' gaca innë'

31 Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. 32 Bönachi ni' dujuá'gaca tuë' bönni' nacödzüë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'. 33 Jesús bubéajë' lë' tsölá'alö ládjagaca bönachi na', ate' bunë'ë xibön në'ë yeru náguië' bönni' na'. Gurú'unë' zxoná'do', en gudanë' lúdxë'ë. 34 Ní'irö buyúë' lúzxibálö, en gunnë lúdxë'ë, rnnë':

—Efata.

Didza' hebreo ni rna lu didza' xidza': Guyalaj.

35 La' böäljatë náguië', en la' bugújtjatë lúdxë'ë, en gunnë'të' dxí'ado'. 36 Jesús gunná bé'enë' légaquië' cunttu nu ilë' ca', pero tsca gunná bé'enë' légaquië', bulu'zëtë're' ca' didza' que lë na' benë'. 37 Bulu'bánninë, ta'nnë':

—Tsáhuí'do' runë' yúgu'të. Runë' ga tu'yöni nupa gulaca cödzü, en ga tu'f'i didza' nupa biti' guca ila'nnë.

Rugahuë' Jesús zianró ca choá' gayuá' bönachi

(Mt. 15:32-39)

1 Yugu' dza na' bulu'dubi bönachi zian ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. 2 Gudxë' légaquië':

—Ruhuechi' ládxa'a bönachi zian ni tu' chinaca tsonna dza nacuá'len neda' ni, en bití' dë le ilágugaca. 3 Channö usöl-la'a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

4 Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

5 Gunábinë' Jesús légaquië', rnnë':

—¿Bál-laxi yöta xtila dë queëli'?

Të' Lë':

—Gádxisö.

6 Ní'irö Jesús gunná bé'enë' bönachi zian na' ila'bö' lu yu. Gudélë'ë gadxi yöta xtila na', ate' gudxë' Dios: "Xclenu'." Ní'irö buzuxzjë' léguequi, en bë'ë quégaquië' bönni' usëda queë' para ila'guísië' lógaca bönachi zian na'. 7 Guta' ca' quégaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guísië' ca' légacaba' lógaca bönachi. 8 Gulagu yúgu'të bönachi na', en bulu'huölaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. 9 Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, 10 ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

11 Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'.

Gulë'ënnë' ila'zif' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. 12

Gunnëda' ládxe'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

13 Ní'irö bulá'alenë' légaquië'. Bubenë' lë'e bárcodo', en sa'yéajë' ia'tsölá'a nísado'.

Le tu'sëdinë' bönni' yudo' naca ca cúa zi que yöta xtila

(Mt. 16:5-12)

14 Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'.

15 Ní'irö Jesús buzéajni'inë' légaquië', rnnë':

—Buli'yútsöca' queëli'. Guli'gún chí'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

16 Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

17 Réquibe'ené' Jesús le ta'nnē', ate' rē' légaquiē':

—¿Bixz que ru'ili' caní didza' tu' cabí dē yōta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsō zidi icja lādxi'do'oli'? 18 ¿Zóatsō guiōj loli', en biti' rilé'eli', en zóatsō guídi nágali', en biti' riyōnili'? ¿Naru' cabí röjnétseli'? 19 Cate' ni' buzuxzja' gayu' yōta xtila, ate' gulahuē' chi-un gáyu'ē bönni', ¿bál-laxi ga'bōra bulili' le bizxaj butúbili'?

Gula'nnē':

—Chinnu.

20 Gunnē' ca' Jesús:

—Cate' ni' buzuxzja' gadxi yōta xtila, ate' gulagu choá' gayuá' bōnachi, ¿bál-laxi ga'bōra bulili' le bizxaj butúbili'?

Gula'nnē':

—Gadxi.

21 Ní'irō Jesús gudxē' légaquiē':

—¿Naru' cabí réajni'itseli' na'a, bē'a didza' que le tu'sēdinē' bönni' na'?

Jesús ruúnē' bönni' Betsaida nachul-la lahuē'

22 Cate' Jesús, en bönni' dá'gaquiē' Lē' bila'dxinē' yōdzō Betsaida, bila'dxín ga zoē' Jesús nupa dujuá'gaquiē' queē' tu bönni' nachul-la lahuē'. Ta'tá'yuē' lahuē' canē' bönni' na'. 23 Jesús gudélē'ē nē'ē bönni' na' nachul-la lahuē', ate' guchē'ē lē' ní'ilō ra' yōdzō. Ni' budxíē' zxōna' guiōj lahuē', en guxóa nē'ē lē'. Ní'irō gunábinē' lē', rnnē':

—¿Ba rilé'enu' lati'?

24 Buyúē' bönni' na' nachul-la lahuē', rnnē':

—Rilé'egacada' bōnachi, nalá'gaca ca yugu' yaga, pero ta'dá bōnachi na'.

25 Leyúbölō guxóa nē'ē Jesús guiōj lahuē', ate' buyúédē'ē bönni' na' nachul-la lahuē', ate' böácatē dxí'ado' guiōj lahuē'. Na'a rilé'enē' dxí'ado' yúgu'tē. 26 Ní'irō Jesús gusōl-lē'ē lē' lidxē', rnnē':

—Biti' tsōjdōdu' lahuí' yōdzō, en cuntu nu guío' le bena' nu zoa lu yōdzō ni.

Rnnē' Pedro: “Jesús náquiē' Cristo”

(Mt. 16:13-20; Lc. 9:18-21)

27 Gudōdi na', bulu'zē'ē Jesús, en yugu' bönni' usēda queē' ni', ate' gula'dödē' yugu' yōdzōdo' nabábagaca Cesarea, ga na' rinná bē'ē Filipo. Tsanni ni' yú'ugaquiē' nōza, Jesús rinabi yudxē' yugu' bönni' usēda queē', rnnē':

—¿Nuzxi ta'nná bōnachi naca'?

28 Bulu'bi'ē didza', ta'nnē':

—Ta'nná bal-la bōnachi nacu' Juan, bönni' buquilē' bōnachi nisa. Ta'nná ia'bal-la nacu' Elías, bönni' bē'ē didza' uláz queē' Dios dza ni'te. Ta'nná ia'bal-la nacu' bönni' yúbölō bē'ē didza' uláz queē' Dios dza ni'te.

29 Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

30 Ní'irö Jesús gunná bé'enë' légaquië' cuntu nu ulu'siyönnë' Nu náquië'.

Riguíxjö'ë Jesús ca si' ilútië' Lë'

(Mt. 16:21-28; Lc. 9:22-27)

31 Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zëajni'inë', en yugu' bixúz unná bé', en bönni' yudo' tu'sëdinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

32 Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë'

didza'. 33 Buécjë' Jesús, en buyúë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxi'u biti' za' lu në'ë Dios, pero ca ta'zá' ládxi'gaca bönachi naca.

34 Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö rë'ënë' nu bönni' të'ë neda', ral-la' uzóë' tsölá'alö le rë'ëni quézinë', en gáquië' ca tu bönni' sa'yëajë' sötjëtë' lë'e yaga cruz, ate' ní'irö huáca të'ë neda'. 35 Nu bönni' ru'ida' ládxi'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. 36 ¿Naru' uzi'tsë' xibé tu bönni' channö utubë' yúgu'të le dë yödzülió ni, pero uniti cuinë'? 37 Biti' bi gaca unödzejë' tu bönni' le huöá'ui cuinë'. 38 Channö zoë' nu bönni' rutu'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utu'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

Mark.9.1 Jesús gudxë' ca' légaquië', rnnë':

—Le nácatë rea' libí'ili', nacua' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

2 Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu gu'fa sibi. Ni' bidzá'a ca riná' lahuë' Jesús lógaquië' yonnë' na'. 3 Guyëpi yösa bení lari' nácuë' Jesús, ate'

guca chiguíchido'os. Zxíla'do'os guca, le cuntu nu ra' lari' yödzülió ni gaca gun chiguíchido'os ca guca lari' na'. 4 Bulu'lufi lógaquië' Elías, en Moisés, tu'ílenë' Jesús didza'. 5 Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

6 Caní gunnë' Pedro tu' cabí nõzinë' bi na' rnnë', tu' tádxinë' bönni' usëda queë' Jesús na'. 7 Ní'irö gurö'ö böaj le gulú'u zxul-la légaquië', ate' biyõn chi'i nu ru'í didza' lu böaj na', rna:
—Bönni' ni Zxí'ina'. Nadxí'ida' Lë'. Buli'zë nágali' Lë'.

8 La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

9 Tsanni ni' yú'ugaquië' nõza, tu'dínnië' lu gu'á sibi na', Jesús gunná bé'enë' légaquië' cunt nu ulu'siyõnnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. 10 Que lë ni na' gula'gú'usë' íc'jagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunnë' ubanë' lu yöl-la' guti. 11 Gula'nábinë' Jesús, ta'nnë':
—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

12 Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'í sáquë'ë Bönni' Guljë' Bönachi, ate' cá'asö ulu'cá'ana bönachi Lë'? 13 Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

14 Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacua' bönachi zían ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'. 15 Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijöd'xigaca Lë': "Padiux."

16 Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

17 Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'.

18 Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zëqui'në'.

19 Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

20 Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. 21 Ní'irö Jesús gunábinë' xúzibi' bi'i na', rnnë':
—¿Gáca'xi chiguca raca caní queëbi'?

Rnnë' xúzibi' na':

—Ní' nácatëbi' bí'ido' ré'ebi' caní. 22 Zían luzuí rirú'una lëbi' lu guí, en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

23 Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

24 La' bë'të' zidzaj didza' xúzibi' bi'i na', rnnë':

—iRéajlë'a! iGúcalen neda' para tséajlë'ëra' Lë'!

25 Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bítirö tsu'u lëbi'.

26 Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'í didza' bönachi zían ni', ta'nná:

—Chinátibi'.

27 Ní'irö Jesús gudélë'ë ná'abi', en buchisë'-bi', ate' guzufíbi' bi'i na'.

28 Ní'irö guyazië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

29 Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús riguíxjö'ë leyúbölö ca sí' ilútië' Lë'

(Mt. 17:22-23; Lc. 9:43-45)

30 Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesús nu inözi ga na' zoë' 31 tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

32 Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

33 Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

34 Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. 35 Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

36 Ní'irö Jesús gudélë'ë-bi' tubi' bí'ido', en buzöë'-bi' gatsaj láchui'lö ga na' nacu'ë. Ni' runidë'-bi', rë' légaquië':

37 —Nu bönni' si' lu në'ë tu bí'ido' caní tu' néqui'bi' quia', si' lu në'ë ca' neda', ate' nu bönni' si' lu në'ë neda', calëga néda'sò si' lu në'ë, pero si' lu në'ë ca' Xuza', Bönni' na' nasòl-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

38 Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

39 Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' innë' zì'ë quia'. 40 Caní naca, nu biti' ridá'baga' rë'u, rácalen nu na' rë'u. 41 Núti'tës nu gunna queëli' tu xzíga'do' nisa guf'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queëru' gunru' ga nu gun dul-la'

(Mt. 18:6-9; Lc. 17:1-2)

42 Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. 43 Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guf' gabila, ga ni' biti' ulu guf' que. 44 Lataj ni' biti' ilátiba' buzuga' yú'ugacaba' nupa tsöjcuá' ni', ate' guf' na' biti' ca' ulu. 45 Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guf' gabila, ga ni' biti' ulu guf' que. 46 Lataj ni' biti' ilátiba' buzuga' yú'ugacaba' nupa tsöjcuá' ni', ate' guf' na' biti' ca' ulu. 47 Lësca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bë'ë Dios zoa tuz guiöj lo', calëga zoa chopá guiöj lo', ate' tsöjtsáziu' lu guf' gabila. 48 Lataj ni' biti' ilátiba' buzuga' yú'ugacaba' nupa tsöjcuá' ni', ate' guf' na' biti' ca' ulu.

49 'Ruxi'iru' bëla' zödi', en rugála'ru' le ra' guf', para cabí gaca ditaj. Lë ni rusedi rë'u ca ulu'huóaca dxi'a yúgu'të bönachi. Lësca' caní, rë'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. 50 Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

10

Rusëdinë' Jesús que nu rulá' yöl-la' nutsaga na'

(Mt. 19:1-12; Lc. 16:18)

1 Buzë'ë Jesús yödzo Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. 2 Ní'irö bila'dxinë' bönni' yudo' fariseo ga zoë' Jesús, ate' tē'ënnë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutschaga në'ë usanë'-nu nigula queë'?

3 Bubi'ë didza' Jesús, rnnë':

—¿Bizxi gunná bé'enë' Moisés lib'íli'?

4 Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

5 Bubi'ë didza' Jesús, rnnë':

—Gunná bé'enë' Moisés lib'íli' caní tu' naca zidi icja láchxi'do'oli', 6 pero cate' gusí lo rata' yödzölió, Dios benë' légaquië' bönni', en nigula. 7 Gunnë': "Que læ ni na' ucá'anë' bönni' xuz xinë'ë, en tsöjsóalenë'-nu nigula queë', 8 ate' chopë' ni ulu'huóáquië' ca tuz bönachi." Que læ ni na' bí'ti'rö nácaçaquië' chopë' pero tuz chinácaçaquië'. 9 Que læ ni na' ca', nu naca bönachi biti' ral-la' ulá'a nupa na' chinutsáquië' Dios.

10 Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. 11 Jesús gudxë' légaquië':

—Nú'ti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutschaga na' tu' rusubáguë'ë-nu dul-la' nigula na' guzóalenë'-nu z'í'alö. 12 Lësca' caní channö tu nigula nutschaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutschaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

13 Ní'irö bila'dxín bönachi ga zoë' Jesús dujuá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'. 14 Cate' bilé'enë' Jesús læ ni, gulënë' légaquië', en gunnë':

—Guli'güf'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácaçaca ca bí'ido' ni, lataj ga rinná bë'ë Dios. 15 Le nácatë' rea' lib'íli': Nu cabí si' lu në'e le rinná bë'ë Dios ca runbi' tu bí'ido', biti' ca' tsaza ga ni' rinná bë'ë.

16 Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

17 Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, çnacxi guna' para idéli'da' yöl-la' na'bán idú?

18 Jesús gudxë' læ':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. 19 Chinöz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

20 Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' b'íido'.

21 Len yöl-la' dxi'i ladxi' queë', Jesús buyúé' lë', rnnë':

—Tu le riyadzaj quiu'. Guyéaj, yöjëtí' yúgu'të le dë quiu', en bunödzej quégaca bönachi yechi' lë na' sí'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

22 Cate' biyönnë' didza' ni, bu'innë', ate' söhuöjë' risëbi lãdxë'ë tu' dëda' yöl-la' tsahui' queë'.

23 Ní'irö buyúé' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

24 Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', zxf'ina'do', böniga naca ila'yázië' bönni' tu'zxöni lãdxi'gaquië' yöl-la' tsahui' quégaquië' ga rinná bë'ë Dios. 25 Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

26 Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

27 Buyúé' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

28 Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Lí'.

29 Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' zxf'inë', o xiyúé', tu' runë' xichina' o tu' runë' libán que didza' dxi'a quia', 30 bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' zxf'inë', en yugu' xiyúé', enca' yugu' le ila'bía lãdxi'gaca bönachi lë', ate' lu yödzölió sí' za', gata' yöl-la' na'bán idú queë'. 31 Zián nupa nácgaca lo na'a, ilaca cuídi'sö ni', ate' nupa nácgaca cuídi'sö na'a, ilaca lo ni'.

Leyúbölö riguíxjö'ë Jesús ca sí' ilútië' Lë'

(Mt. 20:17-19; Lc. 18:31-34)

32 Cate' ni' yú'ugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'.

Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ruí'ilenë' légaquië' didza' ca naca le ral-la' gaca queë'. 33 Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljé' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'. 34 Bönni' na' ulu'titjé' neda', en ilúndë'ë neda' zi'. Ulu'chejé' neda' zxoná'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

35 Ní'irö gula'biguë'ë Jacobo, en Juan, zxf'inë' Zebedeo, lahuë' Jesús, en tē' Lë':

—Bönni' Usedi, rë'ënitú' gunu' queëtu' le inábatu'.

36 Jesús gudxë' légaquië':

—¿Bizxi rë'ënili' guna' queëli'?

37 Gulë' Lë':

—Cate' idxín dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

38 Ní'irö Jesús gudxë' légaquië':

—Biti' nõzili' bi rinábalí'. ¿Naru' huáca sí'ili' le ral-la' sí'a neda', le naca le qui'i saca'a? ¿Naru' huáca idíflali' nisa ca idila' neda' nisa, gátia'?

39 Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idíflali' ca' nisa, 40 pero biti' dë lu na'a cöa' nu cuía cuita' ibëla, en nu cuía cuita' yögöla. Dios unödzejë' quégaquië' bönni' chinupë'ë quégaquië' yugu' lataj na'.

41 Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. 42 Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácatëca lo ládjagaquië' ta'nná be'e luzë'eguequi. 43 Biti' gaca caní queëli', pero nu guë'ëni gaca zxon ga zóali', ral-la' gun xichinli' ia'zica'röli', 44 ate' nütí'tëslöli' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. 45 Caní ral-la' gunli' tu' bida' ni neda', Bönni' Guljé' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

46 Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ní' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nõza ni' rö'ë tu bönni' nachul-la lahuë', lë' Bartimeo, zxf'inë' Timeo. Rinabë' nu bi gúnнасö queë'. 47 Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—iJesús, xzí'ini xi'sóë' David! iBuéchi' ladxi' neda'!

48 Nupa ta'dödi ni' gula'dil-la lë' didza'. Të' lë':

—Busayaj ru'u.

Ní'irö zídzejrö bulidzë', rnnë':

—iXzí'ini xi'sóë' David! iBuéchi' ladxi' neda'!

49 Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të' lë':

—iButipa ládxi'u! iGuyaschi! iRulidzë' li'!

50 Ní'irö gurú'unë' tsólá'alö lari' naxóa yenë'. La' guyásatë', en bidë' ga na' zoë' Jesús. 51 Jesús gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huóalaj guiöj lahua'.

52 Jesús gudxë' lë':

—Böaj lidxu'. Chinuhuóacu' tu' réajlë'u neda'.

La' böäljatë guiöj lahuë', ate' sa'yéajlenë' Jesús.

11

Riyazië' Jesús yödzö Jerusalén

(Mt. 21:1-11; Lc. 19:28-40; Jn.12 :12-19)

1 Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzö Betfagé, en yödzö Betania, en ga na' dë ca' Gu'fa Yaga Olivo. Ní'irö Jesús gusól-lë'ë chopë' bönni' usëda queë', 2 en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsójaxáca'li'-ba' tuba' búrrodo' nága'ba' ni', en cuntu nu ribáni lëba'. Guli'sedxi-ba', en guli'chë'-ba' quia' ni. 3 Channö nu bi gufé libí'ili' tu' runli' lë ni, guli'gufé nu na': "Xanru' riquinnë'-ba', ate' la' usól-la'të'-ba' quiu'."

4 Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'.

5 Nupa nacua' ni' të légaquië':

—¿Bizxi ni runli'? ¿Bizx que risédxili'-ba' búrrodo' na'?

6 Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj. 7 Ní'irö gula'chë'-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. 8 Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

9 Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'í zidzaj didza', ta'nnë':

—iYöl-la' ba! iXanru' Dios gun lá'ayë' Bönni' zë'ë ni, nasól-lë'ë Dios Lë'! 10 iDios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! iYöl-la' ba Dios!

11 Caní guca, bidxinë Jesús Jerusalén, ate' guyázië lö'a yudo'. Cate' budxi buyúë yúgu'të le nacua' idú gásibi'ilö ni', burúajë zaca' yödzö Betania tu' chiridzö', ate' dzágagaquië Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

12 Cate' za' rení ia'tú dza, ate' tu'rúajë Jesús, en yugu' bönni' dá'gaquië Lë' yödzö Betania, ridunë Jesús. 13 Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsójxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxía tu' cabí ridxini dza cuía. 14 Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn.2 :13-22)

15 Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'. 16 Biti' ca' bë'ë lataj nu bi guá', uzóa nöza ga naca lö'a yudo'. 17 Busëdinë' nupa nacua' ni', rnnë':

—Nazúaj lu guichi lá'ayi, rna: "Lidxa' si'i le, yu'u ga bönachi idútë yödzölió ulu'lidza Dios." Libí'ili' chinunli' le ca naca lídxigaca gubán.

18 Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' naxci ilútië' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusëdinë' Jesús. 19 Cate' chiridzö' burúajë' Jesús lu yödzö na'.

Ribidxi yaga higo bulidza zi'ë Jesús

(Mt. 21:20-22)

20 Cate' za' rení ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. 21 Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

22 Bubi'ë didza' Jesús, rë' légaquië':

—Guli'tseajlë' Dios. 23 Le nácatë rea' libí'ili', channö nu bönni' guíë' guf'ado' ni: "Gucuíta ni, yöjsóa lu nísado'", en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. 24 Que lë ni na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queëli' lë na' rinábali', ate' gunnë' queëli'. 25 Cate' ni' rulídzali'-në' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. 26 Channö cabí uniti lolí bönachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bē' dē lu nē'ē Jesús

(Mt. 21:23-27; Lc. 20:1-8)

27 Ní'irō Jesús, en yugu' bönni' dá'gaquiē' Lē' yöjhuōjgaquiē' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bönni' yudo' usedi, en bönni' gula tu'zējai'nī'ine', ga zoē'. 28 Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

29 Bubi'ē didza' Jesús, rē' légaquiē':

—Neda' ca' inábida' lib'íli' tu didza'. Channö ubf'ili' quia' didza', n'í'irō guía' lib'íli' bi yöl-la' unná bē' rúnida' yugu' lē ni. 30 ¿Nuzxi budödi lu nē'ē Juan uquilē' bönachi nisa? ¿Naru' Dios o bönachi? Guli'nnátsöca'.

31 Gula'sí lógaquiē' tun xtí'dza'gaquiē' la' légacasē', ta'nnē':

—Channö innaru' Dios gusöl-lē'ē lē', guíē' rē'u: “¿Bizx que bití' guyéajlē'ēli' lē'?” 32 ¿Naru' guíētsaru'-nē': Gula'söl-lē'ē bönni' lē'?

Caní ta'zá' láchxí'gaquiē' tu' tádxinē' le ilún bönachi zían nacua' ni' tu' téquiguequi yúgu'tē bönachi na' bē'ē didza' Juan na' uláz queē' Dios. 33 Que lē ni na' gulē' Jesús:

—Bití' nōztu'.

Ní'irō Jesús gudxē' légaquiē':

—Neda' ca' bití' quíxjöi'ida' lib'íli' bi yöl-la' unná bē' dē lu na'a rúnida' yugu' lē ni.

12

Rucú'dzu'ē didza' Jesús ca gaca quégaca huen dxin bití' nácagaca tsahui'

(Mt. 21:33-46; Lc. 20:9-19)

1 Ní'irō gusí lahuē' Jesús ruf'ilenē' yugu' bönni' dá'gaquiē' Lē' didza' yugu' le rucú'dzu'ē didza', rnnē':

—Guzóē' tu bönni', budē'ē lubá uva zían ga naca lu xiyúē'. Guléquiē' lē'a que, en guchō'önē' tu röga' guiōj ga isíē' xisi uva na'. Budxíē' tu yu'u gupa ga naca xitsá' ga nu uyú xiyúē' na'.

'Ní'irō budödē' xiyúē' na' lu ná'agaquiē' huen dxin, ila'zi'ē gatsaj huéaj le unödzej, ate' guyijē' yödzö zi'tu'. 2 Cate' bidxín dza ulu'chibē' le ribía, gusöl-lē'ē-bi' bi'i huen dxin tsöjxí'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'. 3 Ní'irō yugu' huen dxin na' gula'guélē'ē-bi' bi'i na', en gulundē'-bi' zi', ate' bulu'söl-lē'ē-bi' cá'asöbi'. 4 Ní'irō bönni' xan luyú na' gusöl-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guiōj. Bulu'lē'ē ícjabi'. Gulu'ē dö' queēbi'. 5 Ní'irō bönni' xan luyú na' gusöl-lē'ē-bi' ca' ia'tubi' bi'i huen dxin queē', ate' bi'i ni gulútiē'-bi'. Gusöl-lē'ē-bi' ca' zíanröbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

6 'Cúnturö nu nagá'ana queē' xan luyú na'. Nagá'anasibi' zxf'inē', ate' nadxí'ide'enē'-bi'. Ga yöjsetē, gusöl-lē'ē-bi' zxf'inē', rnnē': “Ilunē' bal zxf'ina'.” 7 Ní'irō yugu' bönni' huen dxin na' gula'nnē' la' légacasē', ta'nnē': “Bi'i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni.”

8 Que lē ni na' gula'zönē'-bi', en gulútiē'-bi'. Gula'ru'unē'-bi' n'í'ilo ga dá'gaca lubá uva na'.

9 Ní'irō Jesús gunábinē' bönni' nacu'ē ni', rnnē':

—¿Nacxi gunē' bönni' xan luyú na', channö? Huidē', en gútigaquiē' bönni' huen dxin na', ate' udödē' luyú na' lu ná'agaquiē' bönni' yúbölö.

10 '¿Naru' cabí nulábanili' lè na' nazúaj lu guichi lá'ayi? Caní rna:

Guiōj na' gula'ru'unë' bönni' tu'cu'ë zö'ö, na'a naca guiōj len, squin zö'ö.

11 Xanru' Dios benë' ga naca caní ate' rubániru' ca naca lè ni rilé'eru'.

12 Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacuá' ni', en que lè ni na' bulu'cá'anë' Lë', söhuōjgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

13 Gudödi lè ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. 14 Bila'dxinë' bönni' ni ga na' zoë' Jesús, en tē' Lë':

—Bönni' Usedi, nōzitu' ru'u didza' idútë li. Biti' ru'í lādXu'u bi ta'nnasö bönachi, tu' cabí ruyusu' le tu'luf'isö cúnguequi bönachi, pero rusëdinu' ca nácatë le rē'ënë' Dios ilún bönachi. ¿Ru'í netu' lataj xibá queë' Moisés quíxaj laztu' le tu'quíxjë' uláz queë' César? ¿Naru' uguíxajtu' o bití' quíxajtu'?

15 Réquibe'enë' Jesús tu'ë didza' lu yöl-la' rigúflaj ladxi' quégaquië', ate' rē' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

16 Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lè ni?

Bulu'bi'ë didza', ta'nnë':

—Queë' César na'.

17 Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bánninë' ca naca didza' bubí'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

18 Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lè ni na' gulë' Jesús, ta'nnë':

19 —Bönni' Usedi, Moisés nuzájë' queëru' lu guichi channö gátie' tu bönni' bití' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alēnbi'-nu, en uzóabi' bí'ido' gácabi' bi'i queëbi' böchi'bi'. 20 Gula'cuá'abi' gádxibi' bi'i nácgacabi' böchi'gacabi'. Bi'i huáca na' butsga ná'alēnbi'-nu nigula, ate' gútibi', cuntú nu zoa bí'ido' queëbi'. 21 Bi'i buropi na' butsga ná'alēnbi'-nu nigula uzēbi na', ate' gútibi' ca', cuntú nu zoa bí'ido' queëbi'. Lësca' caní guca queëbi' bi'i bunni. 22 Caní guca, bulu'tsaga ná'alēnbi'-nu yúgu'tēbi', cuntú nu zoa bí'ido' quégacabi'. Ga yōjsetë, gútinu ca' nigula na'. 23 Na'a, cate' ulu'bán nupa chinátigaca, ínúzxlöbi' guéquinu nigula na' queëbi', tu'

bulu'tsaga ná'alenbi'-nu igádxitēbi'?

24 Bubi'ë didza' Jesús, rē' légaquiē':

—Richíxili' tu' cabí núnbē'ēli' le nazúaj lu guichi lá'ayi, en biti' nōzili' ca naca yōl-la' huáca queē' Dios.

25 Cate' ulu'bán nupa chinátigaca, biti' ca' ulu'tsaga ná'agaquiē', ate' yugu' bönni' biti' ila'cuá'lenē'

nigula, pero ilácagaquiē' ca nácagaquiē' gubáz lá'ayi queē' Dios, nacu'ë yehua' yubá. 26 Na'a, ca naca

quégaca nupa chinátigaca channō ulu'bán, ¿naru' cabí nulábanili' le buzúajē' lu guichi Moisés? Rufi

didza' ca na' bulidzē' Dios lē' lu yaga yōtsi'do' régui. Gudxē' lē': "Neda' naca' Dios queē' Abraham, en

Dios queē' Isaac, en Dios queē' Jacob." Tu' gunnē' caní quégaquiē', naca bē' nabángaquiē' sal-la' gulatiē'

zí'alō. 27 Dios náquiē' Dios quégaca nupa nabángaca, calēga quégaca nupa nátigaca tsaz. Richíxiterōli'.

Le naca lo le gunná bē'ë Dios

(Mt. 22:34-40)

28 Bidē' ca' tu bönni' yudo' usedi ga zoē' Jesús. Biyönnē' ca na' guluf'ilenē' Jesús didza', en nōzinē'

dxí'ado' bubí'ë Jesús didza'. Que lē ni na' gunábinē' Jesús, rnnē':

—¿Bízxilō le gunná bē'ë Dios nácatērō lo ca yúgu'tē le gunná bē'ë?

29 Bubi'ë didza' Jesús, rē' lē':

—Le gunná bē'ë le nácatērō lo ca yúgu'tē naca lē na' rna: "Guli'yōni bōnachi Israel. Xanru' Dios, tuzē'

Lē' náquiē' Xanru'. 30 Ral-la' idxí'inu' Xanu' Dios idú lādxi'u, en lu idú icja lādxi'do'o, en lu idú yōl-la'

rējajni'i quiu', en lu idú yōl-la' huáca quiu'." Lē ni naca le gunná bē'ë le nácatērō lo. 31 Le gunná bē'ë le

naca buropi, lēbisō ca naca. Caní rna: "Ral-la' idxí'inu' luzó'o ca nadxf'i cuinu'." Biti' ca' zoa ia'tú le

gunná bē'ë le nácarō lo ca chopa ni gunná bē'ë.

32 Ní'irō bönni' yudo' usedi na' gudxē' Jesús, rnnē':

—Dxí'ado' gunnó', Bönni' Usedi. Le nácatē rno'. Tuzē' náquiē' Dios, en cúnturō nu zoa naca Dios. 33

Para idxí'iru'-nē' Dios idú lādxi'ru', en lu idú yōl-la' rējajni'i queēru', en lu idú icja lādxi'do'oru', en lu

idú yōl-la' huáca queēru', en para idxí'iru' luzá'aru' ca nadxf'i cuinru', nácarō lesaca' ca yúgu'tē bōa'

bēdxido' rútigacaru'-ba' lu bucugu lá'ayi queē' Dios, enca' ca yúgu'tē bōa' bēdxido' ruzégui'gacaru'-ba'

lu bucugu na'.

34 Cate' biyönnē' Jesús dxí'ado' rubi'ë didza' bönni' ni, ní'irō gudxē' lē', rnnē':

—Ia'látisō riyadzaj quiu' gúnbē'u le rinná bē'ë Dios.

Cúnturō nu burugui bi inábini Jesús.

¿Nuzxi zxf'ini náquiē' Cristo?

(Mt. 22:41-46; Lc. 20:41-44)

35 Cate' ni' rusēdinē' Jesús bōnachi ga naca chila yudo', rnnē':

—¿Bizx que ta'nnē' bönni' yudo' usedi náquiē' Cristo zxf'ini xi'sóē' David? 36 Lē cazē' David na' bē'ë

didza', zóalenē' Dios Bō' Lá'ayi lē', gunnē':

Xanru' Dios gudxē' Xana':

“Gurō'ō cuita lē'a ibēla

cate' gunra' ga ulu'zóa zxfbigaca lo'
nupa biti' ta'lé'e Li' dxi'a."

37 ¿Naru' nácatsë' Cristo zxf'ini xi'sóë' David channò lè cazë' David na' rnnë' queë' náquië' Xanë'?
Bönachi zían nacuá' ni' tu'zë nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sëdinë'

(Mt. 23:1-36; Lc. 11:37-54; 20:45-47)

38 Ní' rusëdinë' Jesús yugu' bönni' dá'gaquië' Lë', rë' légaquië':
—Gulí'gún chí'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilò na'lò,
nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi.
39 Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' t'ë'aj tahuë'. 40
Rugúagaquië' lídxigacanu nigula uzëbi, en para ulu'luf'isö tsahui' cuíngaquië', xidzé tu'lidzë' Dios.
Bönni' ni, gúnda'rë' Dios légaquië' xíguia'.

Le bunödžjanu tu nigula uzëbido' queë' Dios

(Lc. 21:1-4)

41 Tsanni ni' rö'ë Jesús chila yudo' ga zoa guf'ina ga ta'gú'u bönachi dumí que yudó', ruyúë' ca tun
bönachi ta'gú'u dumí lu guf'ina. Dumí zían ta'gu'ë bönni' dë yöl-la' tsahui' quégaquië'. 42 Ní'irö
bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os. 43
Ní'irö bulidzë' Jesús yugu' bönni' usëda queë', en rë' légaquië':
—Le nácate' rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu guf'ina que
yudo'. 44 Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do'
queënu gulú'unu idútë la's dui tsca le dësö queënu, le ral-la' gáhuinu.

13

Riguíxjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

1 Cate' burúajë' Jesús chila yudo', tuë' bönni' usëda queë' gudxë' Lë', rnnë':
—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

2 Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönachi
léguequi.

Le ilaca bë' cate' si' údxi que yödžolió

(Mt. 24:3-28; Lc. 21:7-24; 17:22-24)

3 Ní'irö yöjáquië' Jesús, en yugu' bönni' dá'gaquië' Lë' lu Guf'a Yaga Olivo, guf'a na' dë ca dödölö ra'
yudo'. Cate' chirö'ë Jesús ni', la' légasasë' Pedro, en Jacobo, en Juan, en Andrés, gulë' Lë', ta'nnë':

4 —Gudíxjöi'i netu' bítaxi ilaca lë ni. ¿Bizxi gaca bē' chizóa ilaca yúgu'të lë ni?

5 Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'. 6 Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'zi' yé'enë' bönachi zían.

7 'Ní'irö cate' yónili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. 8 Tu yödzo tíl-lalen ia'tú yödzo, en tu ga nu rinná bē' tsöjtíl-lalen ia'tú ga nu rinná bē'. Zían lataj tödi budó' xzu', en tsu'u gubín. Ila'tsatsa bönachi. Yugu' lë ni ilaca le isí lo ila'guí'i ila'zaca' bönachi dza ni'.

9 'Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzo zi'tu'. Ilunë' caní queëli' tu' dá'ali' neda', pero gunli' ba nalf quia' neda' ni'. 10 Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzoilió. 11 Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' güf'i ládxi'li' bizxi innali'. La' dza ní'isö Dios gunnë' queëli' didza' güf'ili', ate' lë ni innali'. Cate' ni' güf'ili' didza', calëga libí'isili' na' innali', pero Dios Bö' Lá'ayi innë'. 12 Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacua'abi' bi'i quégaquië' ulu'dödë' la' zxf'inigaca cazë' ca', ate' zxf'inigaquië' na' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'. 13 Yúgu'të bönachi ulu'zóa libí'ili' tsölá'alö tu' dá'ali' neda', pero nülöli' guá' ilenli' lë na' ga idxinrö dza údxi, uláli'.

14 'Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bē'ë didza' uláz queë' Dios, le rna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsöjaca gapa naca lu gu'ado'. 15 Nu zoa ícjo'olö dza ni' ral-la' izxúnnajtë, en biti' huötaj xzan yu'u para tsöjzxi' bi dë que lu yu'u. 16 Nu zoa la' guixi' ral-la' izxúnnajtë, en biti' huöaj tsöjzxi' lari' rixóa yeni. 17 Bica' bayechi' yugu' nigula dza ni' nuá'agacanu-bi' b'í'ido', enca' nigula tu'gádxinu-bi' b'í'ido'. 18 Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. 19 Yugu' dza ni' ila'guí'i ila'zaca'rö bönachi ca le guca zí'atëlö cate' si' guta' yödzoilió le benë' Dios ga ridxintë na'a dza, ate' dza zá'gaca biti' gaca caní. 20 La'tu' cabí nunë' Dios ga ulu'huóaca nabábasö yugu' dza ni', cuntú nu ulá, pero tu' nadxf'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

21 'Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni zoë'", biti' ca' tséajlë'ëli' nu na'. 22 Ila'lá' lahuë' zían bönni' ila'zi' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luf'inë' le ilaca bē', en ilunë' yugu' yöl-la' huáca zxön. Huala'zi' yé'enë' ca' nupa gurö cazë' Dios channö ila'zéqui'në'. 23 Ní'irö libí'ili', guli'sóa ban ladxí'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

24 Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en biti' cu'u bení beo'. 25 Ila'guínnaj böljaj lúzxiba, en ila'zxizi le nál-lagaca nalá'gaca lúzxiba na'. 26 Ní'irö ila'lé'eni

neda', Bönni' Guljē' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. 27 Isöl-la'gaca'-nē' gubáz lá'ayi quia', ate' ulu'tubē' bönachi gurō caza' quia' nacua' idapa la'a yödžölió, ga naguéla'tē luyú bidxi, ga ridxintē ga naguela' lúzxiba.

28 'Guli'tséajni'i le rusedi yaga higo ni'. Cate' ta'lén ni'a nē'e huē'enido', en rubía xilagui' yulu, nōzili' chizóa idxín beo' cusubá. 29 Lēasca' caní, cate' ilé'eli' taca lē ni, inōzili' chizóa idxín dza údxi na', en chiridzaga lo. 30 Le nácatē rea' libí'ili', yúgu'tē lē ni ilaca zí'atēlō ca ilátigaca nupa nacua' dza na'. 31 Huadōdi que lúzxiba, en que luyú ni, pero xtídza'a catu caz tōdi que.

32 'Cate' idxín dza ni' o rēla ni', cuntu nu nōzi. Biti' nōzguequinē' gubáz lá'ayi nacu'ē yehua' yubá, en bití' nōzda' neda', Zxí'inē' Dios. Tuzē' Dios Xuz nōzinē'. 33 Que lē ni na', buli'subán ládxi'li'. Guli'sóa sina', en buli'lidzē' Dios tu' cabí nōzili' bizxi dza gaca lē ni. 34 Gaca ca raca cate' sa'yéajē' zi'tu' tu bönni'. Cate' chizóa uzē'ē lidxē', udōdē' lu ná'agaquiē' huen dxin queē' yugu' le dē queē'. Que queēgaquiē' gu'ē xichíngaquiē', en inná bē'ē soa ban ladxi' nu zoa huen chi'i ga nu riyaza. 35 Guli'sóa libí'ili' ban ladxi' tu' cabí nōzili' bátaxi huōdē' xan yu'u, cate' chiridzō', o gatsaj lahui' yēla, o cate' ribōdxiba' böra, o zílado'. 36 Guli'gún caní, para cabí idixáquiē' libí'ili' rásili' channō huōdē' tsálido'os. 37 Lē ni rea' libí'ili', rea' ca' yúgu'tē bönachi: Guli'sóa ban ladxi'.

14

Tun xtídza'gaquiē' bönni' yudo' ila'zönē' Jesús

(Mt. 26:1-5; Lc. 22:1-2; Jn.11 :45-53)

1 Ia'chopa dza ca' gaca Laní Pascua cate' tu'subanē' bönni' judío ca benē' Dios, bubéajē' xuz xtó'ogaquiē' luyú Egipto. Naca laní cate' tahuē' yōta xtila bití' nazí' cúa zi que. Ta'zóa ta'bō'ē yugu' bixúz unná bē', en bönni' yudo' tu'sēdinē' ila'zönē' Jesús bagáchi'sō para ilútiē' Lē'. 2 Ta'nnē':
—Biti' gaca sönru'-nē' dza laní tu' ila'tsatsa bönachi.

Nigula rigú'unu le rilá' zxixi icjē' Jesús

(Mt. 26:6-13; Jn.12 :1-8)

3 Zoē' Jesús yödžö Betania, lu yu'u lidxē' Simón, bönni' güf'inē' huē' nudzu' ruzōdi. Tsanni ni' rō'ē rahuē' Jesús, guyázanu tu nigula, nuá'anu tu böga'do' néquini guiōj zaca', yudzu le rilá' zxixi que yōj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjē' Jesús. 4 Gula'lélanē' bal-lē' bönni' nacu'ē ni'. Ta'nnē' la' légacasē':
—¿Bizx que guca ditaj le zxixi na'? 5 La'tu' nu guti' lē na', huazí' que ia'lati' ca lázxjaru' que tu iz para nu quisi le quégaca bönachi yechi'.
Gula'nnēdē'ē queēnu.

6 Ní'irō Jesús bē'ē didza', rnnē':

—Guli'güf'i-nu lataj. ¿Bizx que rinnē zí'ili' queēnu? Naca dxi'a le bennu quia'. 7 Nacuá'lentica'sō bönachi yechi' libí'ili', en bátati'tēs guē'ēnili', huáca gunlí' dxi'a quégagaquiē', pero neda' bití' sóatica'sa' ga zóali'. 8 Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atēlō ca igácha'a yeru ba. 9 Le nácatē rea' libí'ili', gáti'tēs ga gaca libán que didza' dxi'a quia' idú yödžölió, soa nu quixjō' ca' lē ni bennu nigula ni quia'. Caní gaca para nu tsōjnē lēnu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

10 Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bé' para udödë' Jesús lu ná'agaquië'. 11 Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lé' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn.13 :21-30; 1Co.11 :23-26)

12 Naca dza risí lo laní cate' tahuë' yöta xtila bití' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpá'atu' le gáguru' xtsö' que Laní Pascua?

13 Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzo. Ni' huadzágali' tu bönni' nu'ë tu rö'ö nisa. Guli'tséajlenë'. 14 Ga na' tsázië', guli'guíë' xan yu'u na': "Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?" 15 Ní'irö uluf'inë' libí'ili' tu yu'u xzön ga naca buropi cuía ga chinabá'a. Buli'pá'a le gáguru' ni'.

16 Bila'rúajë' bönni' usëda queë' na', en bila'dxinë' lu yödzo, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'. 18 Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

19 Ní'irö bulu'huf'innë', en gula'sí lógaquië' tu tuë' të' Lë':

—¿Naru' neda'?

Ia'túë' ca' gunnë':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna. 21 Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

22 Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

23 Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le.

24 Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quegaca bönachi zían. 25 Le nácatë rea' libí'ili', bíti'rö guf'ja' xisi uva ga idxinrö dza guf'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn.13 :36-38)

26 Gudödi gulúl-lë' yöl-la' ba, bila'rúajë' sójáquië' Gu'fa Yaga Olivo. 27 Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnna: “Gutia'-në' uyú bö'cu' zxila', ate' ilásilasiba' bö'cu' zxila' na'.” 28 Tödi ubana' lu yöl-la' guti, tseja' luyú Galilea zí'alö ca libí'ili'.

29 Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

31 Ní'irö Pedro buzöjtjë' Dios, rnnë':

—Sal-la' gátillentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

32 Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Gulí'cö' ni, tsanni tseja' neda', tsöjlidza'-në' Dios.

33 Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxë'ë. 34 Gudxë' légaquië', rnnë':

—Huati caza' lu yöl-la' risëbi ladxi'. Gulí'cöz ni, en gulí'ná' yëla.

35 Ní'irö guzë'ë Jesús ia'látido', en busudxín lahuë' lu yu, bulidzë' Dios. Gunábinë' Lë', channö huáca, ucúitë' queë' le ral-la' qui'i sáquë'ë dza na'. 36 Ni' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

37 Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu ch'ido'? 38 Gulí'ná' yëla, en bulí'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuúdi'li'.

39 Ní'irö sa'yéajë' Jesús leyúbölö, rulidzë' Dios, en la' tuz ca gunnë'. 40 Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nõzguequinë' bizxi didza' ulu'bi'ë, le ilë' Lë'. 41 Cate' böajë' le bunny luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? iTsca'ti' gaz! iChibidxín dza! iBuli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'! 42 iGuli'chasa, uyéajru'! iBuli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn.18 :2-11)

43 Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' gufë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasól-la'gaquië' légaquië'. 44 Judas, bönni' na' rudödë' Jesús lu ná'agaquië' chinuluf'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. iGuli'sönë', en guli'chë'ë! iGuli'yútsöquië'!

45 Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. 46 Ní'irö gula'zönë' Jesús, en gula'chë'ë Lë' nadzunë'.

47 Ní'irö tuë' bönni' ni' dë'ë Jesús guléajë' gufë tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. 48 Jesús gudxë' bönachi na', rnnë':

—¿Narúajtsali' nuá'ali' gufë tuchi', en yaga para sönli' neda', runli' ca runli' cate' rizönli'-në' gubán? 49 Yugu' dza guzóalena' libí'ili' rusëdigacada' bönachi ga naca chila yudo', ate' bití' guzxönli' neda', pero raca caní para gaca le nazúaj lu guichi lá'ayi.

50 Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rizxúnnajbi' tubi' bi'i ra'bán

51 Zóabi' ca' ni' tubi' bi'i ra'bán söjnobí' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' 52 pero busanbi' lari' na', en xiguídisöbi' buzxúnnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn.18 :12-14, 19-24)

53 Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. 54 Pedro yöjnahuë' Jesús zítu' zítu'sö, en guyázië' lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guf'.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátie' pero bití' bi bulu'dzölinë'. 56 Bönni' zían gula'nnë' queë' Jesús le cabí nácatë, pero bití' yöjlözagaca le gula'nnë' queë'. 57 Ní'irö gula'zuínë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyõnitu' didza' bë'ë bönni' ni, gunnë: “Uquínnaja' yudo' ni, lë ni nequi lu ni'a lu na' bönachi, ate' tsonna dzaso uchisa' ia'tú le cabí nequi lu ni'a lu na' bönachi.”

59 Lësca' lë ni, biti' yöjlözagaca xtídza'gaquië'.

60 Ní'irö guyasë' bixúz lo na' gatsaj láhui'lö bönachi nacua' ni', en gunábinë' Jesús, rnnë':
—¿Naru' cabí rubi'itso' didza'? ¿Bizxi na' ta'nnë' quiu' bönni' ni'?

61 Jesús, dxisö zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':
—¿Naru' nacu' Li' Cristo, Zxf'inë' Dios Lá'ayi?

62 Bubi'ë didza' Jesús, rnnë':
—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

63 Ní'irö bixúz lo na', lu yöl-la' rilé queë' guchözë' lari' nácuë', rnnë':
—¿Núzxirö naquíniru' nu quixjö'? 64 iRiyõn quézili' rucá'anë' Dios cá'asö len didza' ru'ë! ¿Nacxi rusáca'li' queëli'?'
Yúgu'të' gula'chúguië' queë' gátie'.

65 Ní'irö gula'sí lógaquië' bal-lë' tu'chejë' Jesús zxóna'. Bulu'sayjë' lahuë', en gulundë' Lë' zi', ta'nnë':
—Gunnë yá'atsöca' nuzxi na' bë' Li'.
Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62; Jn.18 :15-18, 25-29)

66 Cate' ni' zoë' Pedro lö'a xzan yu'u, bidxinbi' tubi' bi'i nigula huen dxin queë' bixúz lo na' ga na' zoë'.
67 Cate' bilé'ebi' Pedro, rö'ë rutsë'e cuinë' ra' guf', buyubi' lë', rnnabi':
—Do'o ca' li' Jesús, bönni' Nazaret na'.

68 Gudá'baguië' Pedro, rnnë':
—Biti' núnbë'a-në', en biti' nõzda' bizxi na' rnno'.
Burúajë' Pedro yöjsóë' ga nu riyaza lö'a. Ní'irö gurõdxiba' böra. 69 Buyubi' lë' leyúbölö bi'i nigula huen dxin na', en gusí lobi' rëbi' nupa nacua' ni':
—Bönni' ni dzáguië' légaquië'.

70 Leyúbölö gudá'baguië' Pedro. Ia'lati' gudzé nupa nacua' ni' të Pedro, ta'nná:
—Le nácatë dzagu' légaquië', tu' nacu' bönni' Galilea. Yöl-la' ru'isö quiu' didza' naca bë'u, tu' tuz ca ru'ili' didza'.

71 Gusí lahuë' Pedro rudxía dö' cuinë', en ruzõtjë' Dios, rnnë':
—Biti' ca' núnbë'a-në' bönni' na' ru'ili' didza' ca naca queë'.

72 La' gurõdxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zi'alö

cödxiba' böra le buropi luzuí, tsonna luzuí innó' biti' núnbë'u neda'." Cate' yöjnenë' didza' ni, gusí lahuë' ribödxidë'ë.

15

Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn.18 :28-38)

1 Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídzá'gaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma. 2 Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rno'.

3 Yugu' bixúz unná bë' bulu'zéguië' Jesús didza' le zían. 4 Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzëtsöca' nagu' cate' xö zían le ta'nnë' quiu'.

5 Biti' bi didza' bubí'ë Jesús. Ca' guca, bubánninë' Pilato.

Ta'chúguië' queë' Jesús gátië'

(Mt. 27:15-31; Lc. 23:13-25; Jn.18 :38–19:16)

6 Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, nútí'tës nu ta'naba. 7 Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'. 8 Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. 9 Bubi'ë didza' Pilato, rnnë':

—¿Rë'ënili' usana'-në' queë'li' Bönni' Inná Bé'enë' Bönachi Judío?

10 Caní gunnë' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'.

11 Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. 12 Ní'irö Pilato gunábinë' légaquië' leyúbölö, rnnë':

—¿Bizxi ré'ënili' guna' queë' bönni' na' ru'í'ili' lë', Bönni' Inná Bé'enë' Bönachi Judío?

13 Gulu'ë zidzaj didza', ta'nnë':

—iBudë'ë lë'e yaga cruz!

14 Gunábinë' Pilato légaquië', rnnë':

—¿Bizxi caz dö' nu'ë'?

Leyúbölö tu'ë zidzaj didza', ta'nnë':

—iBudë'ë lë'e yaga cruz!

15 Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'.

Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

16 Ní'irö yugu' bönni' röjáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ni'.

17 Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxíë' icjë'. 18 Ní'irö gula'sí lógaquië' tu'lidzë' Jesús, ta'nnë':
—iYöl-la' ba li', rinná bé'enu' bönachi judío!

19 Gula'guínë' gui icjë', en bulu'chejë' Lë' zxöna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal. 20 Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'chë'ë Lë' ní'ilö yúlahui' na' para tsöjda'gaquië' Lë' lë'e yaga cruz.

Tu'dë'ë Jesús lë'e yaga cruz

(Mt. 27:32-44; Lc. 23:26-43; Jn.19 :17-27)

21 Gulunë' ga bi'ë tu bönni' Cirene yaga cruz queë' Jesús, ridödisë' ni' suzë'ë la' guixi'. Lë' Simón, xúzgacabi' Alejandro, en Rufo.

22 Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. 23 Gulu'ë le gu'jje' Jesús xisi uva nutsi' nöri silá' que yaga mirra, pero Lë' biti' gu'ë le. 24 Ní'irö bulu'dë'ë Jesús lë'e yaga cruz, ate' gula'guísië' lari' nácuë', le gula'zí' que queëgaquië' bönni' na' röjáquië' gudil-la. Bulu'béajë' le gaca bë' para ila'nözinë' bízxilö idela' que queëgaquië'.

25 Naca idú xsila cate' bulu'dë'ë Lë' lë'e yaga cruz. 26 Didza' na' bulu'zóë' lë'e yaga cruz ícjalë' Jesús ca naca le tu'quifë' Lë' rnna caní: "Bönni' Rinná Bé'enë' Bönachi Judío." 27 Bulu'dá'lenë' Jesús tsözxön lë'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yögöla. 28 Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

29 Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—iÖn! ¿Naru' uquínnajtso' yudo' queë' Dios, ate' tsonna dzasö uchísatsu' le? 30 iBusólá cuinu' na'a, en bötaj lë'e yaga cruz na'!

31 Lësca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'túë':

—Bönachi yúbölö busölë', pero biti' gaca usölá cuinë'.

32 Ta'nnë' ca':

—iÖn! ¿Nácatsu' Cristo, Bönni' Inná Bé'enë' Bönachi Israel? iBötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn.19 :28-30)

33 Cate' bidxín idú huagubidza, guchul-la idútë yödzölió. Guca caní ga bidxintë idú ridödi xihuö. 34 Idú ridödi xihuö na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj ládxa'u neda'?

35 Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

36 Ní'irö guxíti'ë tu bönni' nútsë'ë ládjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

37 Gurödxí'ë zidzaj Jesús, en la' gútitë'. 38 Biröza' lari' yödx nala' lu yudo'. Birúaj choplö, gudela' icjlä, en birúajtë zxánilö. 39 Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunnë':

—Le nácatë bönni' ni gúquië' Zxf'inë' Dios.

40 Nacuá'anu ca' ni' nigula, zí'tu'sö tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en José. 41 Nigula ni yöjácalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn.19 :38-42)

42 Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío. 43 Que lë ni na' bidë' José, bönni' yödzö Arimatea, bönni' lo ládjagaquië' bönni' yúlahui' lo. Ribözë' ca' dza idinná bë'ë Dios. Idú ládxxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. 44 Bubáninë' Pilato tu' gunnë' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús. 45 Cate' biyönnë' ca na' gunnë' bönni' na' rinná bé'enë' bönni' röjáquië' gudil-la, bë'ë José lataj u'ë Jesús. 46 Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'a guiöj. Budë'ë tu guiöj blaga zxon ga nu riyaza ba na'. 47 María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn.20 :1-10)

1 Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'z'ínu yugu' le rilá' zxixi para tsöjlu'ugacanu Jesús. 2 Ni' naca zilado' dza risí lo, yöjácanu ra' yeru ba queë'. Bila'dxinnu ni' cate' si' gulén gubidza. 3 Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

4 Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxon naca. 5 Gula'yú'unu yeru ba lë'e gu'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. 6 Ní'irö bi'i na' gúdxibi' légaicanu, rnnabi':

—Bí'ti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. 7 Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiëli' légaquië': “Tsejë' Jesús luyú Galilea zí'alö ca lib'ili'. Ni' ulé'eli'-në' ca na' chigudxi cazë'

libí'ili'."

8 Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'í lahuë' Jesús lonu María Magdalena

(Jn. 20:11-18)

9 Cate' bubanë' Jesús zílado' dza na', bulufí lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. 10 Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxí yechí'. 11 Cate' bila'yöni didza' ru'ínu, zoë' nabanë' Jesús, ate' bil'é quézínu Lë', bití' gula'yéajlë' lënu.

Chopë' bönni' usëda queë' Jesús tu'lé'enë' Lë'

(Lc. 24:13-35)

12 Gudödi na', nadzá'alö bulufí lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. 13 Ní'irö bulu'dxinë', dutíxjöi'iguequinë' ia'zíca'rë', ate' ni xtídzá'gaquië' bití' gula'yéajlë'ë.

Le rigu'ë Jesús lu ná'agaquië' bönni' gubáz queë'

(Mt. 28:16-20; Lc. 24:36-49; Jn.20 :19-23)

14 Ga yöjsetë, bulufí lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídzá'gaca nupa na' bila'lé'e Lë' nubanë'. 15 Ní'irö gudxë' légaquië', rnnë':
—Guli'tséaj idútë yödzölió tsöjenli' libán que didza' dxi'a lógaca yúgu'të bönachi. 16 Nu tséajlë' neda', en idila nisa, ulá nu na', pero nu bití' tséajlë', irugu que gati nu na'. 17 Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. 18 Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, bití' bi gun quégaquië'. Ila'xóa në'ë nupa te'e, ate' ulu'huóacatë.

Ruhuëpë' Jesús yehua' yubá

(Lc. 24:50-53; Hc. 1:6-11)

19 Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. 20 Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bë' naca idútë li didza' tu'ë. Ca' naca.